

DOMENIE XX «VIE PAL AN»

Antifone di jentrade Sal 83,10-11

Viôt, Diu, di chel che nus pare,
cjale la muse di chel che tu âs onzût.
Une zornade tai tiei andits
e vâl propit plui che no mil di altris.

Colete

Diu, che tu âs preparât bens invisibii a di chei che ti amin
spant sui nestris cûrs la passion pal to bonvolê
par che, volintti ben in dut e sore dut,
o rivin a sigurâsi lis tôs promessis
che a van plui in là di ogni nestre brame.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jer 38,4-6.8-10

Tu âs fat di me un om di contrast sun dute la tiere.

Dal libri dal profete Jeremie

In chei dîs, i princips i diserin al re: «Che al mueri, par plasê, chest om parcè che cun chest discors
lui ur fâs pierdi vigorie a lis mans dai oms di vuere che a son restâts in cheste citât e a lis mans di
dut il popul, saltant fûr cun chescj sprocs. Di fat chest om nol cîr par chest popul la pâs ma la
disgracie». Dissal alore il re Sedecie: «Velu chi, tes vuestris mans, parcè che il re nol pò nuie cuintri
di vualtris».

Alore lôr a brincarin Jeremie e lu butarin tal poç di Malchie, fi dal re, che al jere tal curtîl des
vuaitis; a molarin jù Jeremie cu lis cuardis. Tal poç no 'nd jere aghe ma pantan. E cussì Jeremie al
lè jù.

Ebed-Melec al jessì de cjase dal re e i fevelà al re cussì: «Re gno paron, chescj oms a àn agjît mâl in
dut ce che a àn fat cuintri di Jeremie il profete, che lu àn butât tal poç; lui li dentri al murirà di fan,
parcè che no 'nd è plui pan in citât». Alore il re i dè chest ordin a Ebed-Melec il Kussit: «Meniti
daûr trê oms e tire fûr dal poç Jeremie il profete prime che al mueri».

Peraule di Diu.

SALM RESPONSORIÂL dal Salm 39

R. Spessee, Signôr, a liberâmi.

O ài metude tal Signôr dute la mê sperance,
lui si è pleât viers di me
e al à scoltât il gno berli. R.

Mi à tirât fûr dal poç de muart
e dal pantan dal palût,
e al à plantât i miei pîts su la crete,
i miei pas ju à saldâts. R.

Al à metût su la mê bocje une cjante gnove,
une laut al nestri Diu.
Che e viodi dute la int e che e temi,
e dal Signôr si fidi. R.

Cumò o soi puar e malmetût,
ma il Signôr par me al proviôt.
Tu sês tu il gno ripâr e la mê difese:

no sta intardâti, gno Diu! R.

SECONDE LETURE Eb 12,1-4

Corin cence clopâ te corse che o vin denant di nô.

De letare ai Ebreus

Fradis, anje nô, cerclâts di cheste fulugne di testimonis, butin vie dut ce che nus pese e il pecjât che nus intrigue e corin cence clopâ te corse che o vin denant di nô, tignint simpri di voli Jesù, risultive e completamente de nestre fede. Lui impen de gjonde che i jere stade proponude, al à cjapade sù la crôs cence cjâlâ a la sô infametât, e si è sentât a la diestre de sente di Diu. Pensait a chel che al à sopuartade cuintri di se une contrarietât cussi grande de bande dai pecjadôrs e cussi no si stracarês e nancje no si lassarês lâ.

No vês ancjemò tignût dûr fin al sanc te vuestre lote cuintri dal pecjât.

Peraule di Diu.

CJANT AL VANZELI cf. At 16,14

R. Aleluia, aleluia.

Vierzinus, Signôr, il nestri cûr
e o rivarin a capî lis peraulis di to Fi.

R. Aleluia.

VANZELI Lc 12,49-57

No soi vignût par puartâ la pâs framieç dai oms, ma la division.

Dal vanzeli seont Luche

In chê volte, Jesù al disè ai siei disepui: «O soi vignût a puartâ un fûc su la tiere, e o varès propit voe che al fos za impiât! O ài di cjapâ un batisim e grande e je la mê passion fin che no lu varai vût! Pensaiso che jo o sedi vignût par puartâ la pâs framieç dai oms? No, us al garantis, ma la division! Di cumò indenant, se intune famee a son in cinc, si dividaran trê cuintri doi e doi cuintri trê. Si dividaran il pari cuintri dal fi e il fi cuintri dal pari, la mari cuintri de fie e la fie cuintri de mari, la madone cuintri de brût e la brût cuintri de madone».

Ur diseve anje a lis folis: «Cuant che o viodês un nûl che al va sù di soreli a mont, o spesseais a dî: E ven la ploe, e cussi al sucêt. Cuant che invezit al svinte il siroc, o disês: Al ven cjalt, e cussi al sucêt. Fals! O sês bogns di induvinâ il timp che al fasarà e cemût mai no rivaiso a capî chest timp di cumò? Parcè no judicaiso di bessôî ce che al è just?».

Peraule dal Signôr.

Su lis ufiertis

Acete, Signôr, i nestris regâi
che nus permetin un incuintri cussi splendit,
par che, ufrintti ce che tu nus âs dât,
o podìn riceviti propit te.
Par Crist nestri Signôr.

Antifone a la comunion Sal 129,7

Cul Signôr si cjate il boncûr
e grande e je cun lui la redenzie.

Daspò de comunion

Signôr, par chest sacrament di Crist che o vin partecipât,
o prein cun umiltât il to boncûr
che tu nus fasis someâ a lui in cheste vite
par podê spartî il so destin di glorie.
Lui che al vîf e al regne tai secui dai secui.